

auff du denn Kugel in/als die Eocle waren/machen solt/ vnd dieselbigen in den Weyer/ See oder Wasser werffen. Wen die Fisch anfahen hin vnd wider zu fahren vnd blißen/ ist es ein anzeigung das sie vom Aas gessen haben. Darauff warte als den eine halbe stund/ so fahren sie selber an das Land/ vnd kehren das Weis vbersich/ so magstu sie darnach leichtlich erreichen. Wenn auch der Teig/ so du darzu gebrauchest/ hart worden/ vnd in widerumb auff eine andere zeit brauchen woltest/ so soltu ihn mit brenntem oder sonsten starckem Wein zuvor erweichen/ so ist er widerumb vorriger Wirkung.

Das sey also kürzlich gesagt vom Otter vnd Biber sagen/ auch von allerley Fisch vñ Krebsfang. Es sollen aber die jenigen/ den der Fischfang verboten/ mercken/ das nicht darumb manlicherley heimlichkeiten des Fischfangs allhie verzeichnet/ beschrieben vnd angezeigt/ das sie sich derselbigen/ daher denn auch billich zu gebrauchen haben/ sondern solches allein/ dieweil nicht wenig zuvor all zu viel der vnrechte/ verborgene vnd diebische Fisch vnd Krebsfang/ in vngewürlicher vñ dung bewusst vnd bekant ist/ zur abmahnung vnd abhaltung beschehen/ verstehen sollen/ wie auß des Herrn Doctor Noe Meurers Wasserrecht weiter zu erschen ist.

### Das sibentzehende Capitel.

## Zu was Zeit vnd Monat im Jar ein jeder Fisch am besten sey.

**A**Wol vnnötig hie anzuzeigen/ wenn ein jeder Fisch am besten sey/ dieweil bevorab einem diese/ einem andern eine andere meinung gefallen möchte/ so wollen wir doch der Alten ire Regel nicht so gar verachten/ vnd vnangezeigt fürüber gehen lassen.

Ein Salm ist im Aprillen vnd Mayen/ vnd ein weil darnach am besten/ vnd bleibt ein Salm bis nach S. Jacobs tag/ als denn wirt er ein Lachs bis auff S. Andreas tag/ vnd ist denn auch zwischen S. Michaels vnd S. Martins tag am besten.

Der Sälmling/ Schnotfisch/ Borellen/ vnd Kufolek/ seyn im Aprillen vnd Mayen am besten/ vnd der Sälmling klein vnd groß/ ist allwegen gut.

Ein Hecht ist im Heymonat am besten/ Aber ein alter Hecht ist allwegen gut/ ohne wenn er den Kogen lasset. Ein gemilchter Hecht oder Karpff/ ist allwegen besser/ den ein gerogter/ also ist es auch vnter andern Fischen.

Ein feister Karpff ist allwegen gut/ außgenommen im Mayen vnd Brachmonat/ so er geleichet.

Ein Schleye ist im Brachmonat am besten.

Ein Bersich ist allzeit gut/ ohne im Merzen vnd Aprillen/ so er geleichet.

Bräsemen vnd Nasen seyn im Hornung vnd Merzen gut/ vnd so die Willigen trieffen/ seyn sie am besten.

Die Willing seyn gut im Merzen vnd Aprillen.

Ein Kope oder Grope/ ist an vnser Frawen Liechtmess/ vnd ein weil darnach/ bis in den Aprillen am besten.

Ein Kottel ist im Hornung vnd Merzen gut/ vnd nimpt widerumb ab im Mayen.

Ein Förn ist wie ein Kottel/ Winterszeit aber ist er sehr gut.

Die Grundelen seyn im Hornung/ Merzen/ Aprillen vnd Mayen sehr gut. Die jungen Grundelen aber mit Peterlin seyn allezeit gut.

Ein Blieglin ist ein guter Fisch/ im Herbst aber ist er am besten.

Die Kressen seyn im Merzen vnd Aprillen am besten/ im Mayen aber neimen sie ab.

Die Suchling seyn im Merzen vnd anfang des Mayen am besten/ so sie voll seyn/ so soll man sie mit Eyern beschlagen.

Die Ael seyn gut im Mayen bis nach vnser Frawen tag der Erndte/ oder nach dem Brachmonat.

Ein Neunaug ist im Hornung vnd Merzen am besten.

Ein Lampret ist nütlicher besser denn im Mayen.

Ein Berlin ist des Lampreten Bruder/ vnd ist vom zwölfften tag des Hornungs/ bis auff vnser Frawen verkündigung in der Fasten immer vberaus köstlich gut.

Ein Steimbis ist im Aprillen vnd Mayen gut.

Die Lueken seyn auch gut im Aprillen vnd Mayen.

Ein